

四庫全書

子部

欽定四庫全書

寶真齋法書贊卷二十四

宋 岳珂 撰

宋名人真蹟

張忠獻時義誠力二帖

並楷書第一帖十二行第二帖十三行

浚再拜啓二十年之別如一彈指間每思慷慨正論未嘗不抵掌興歎也載惟心法所格自結上知擢之遠外恃為耳目而士議謂公展盡忠嘉無負于上聞之悚慰

夫遇合有時進退有義君子何患哉蓋其在我以勉求  
諸天而已何時執手罄所懷馳仰馳仰沒再拜啓上  
沒再拜啓沒誠力俱不足自罹大戾憂患困苦何可勝  
陳中間薦辱教貶感公高義慙悚積心獨不敢輒布謝  
問無他恐讒間之或行也公道不振習俗以成沐知有  
素豈責此耶聖主如天方付公以屏之也重恩禮有隆  
想惟盡力報稱一路受惠至幸至幸沒再啓上

右兩朝相國維師魏國忠獻公凌字德遠于時義誠

力二帖真蹟一卷自諸葛忠武侯以綱常扶大漢尊  
漢一心百戰不屈後二千載而公生義通神明氣貫  
日月萬死無貳炯然此心實酷似之夫隨世就功名  
于事變搶攘中代不乏人而心之所存顯著于當世  
幽質于鬼神歿信于千古與道始終正大明白自隆  
中而下未有若公者也家世笈中多公字蹟中更秦  
禍遺落殆盡珂舊從公之孫匠監忠恕游因願見公  
遺墨寶慶乙酉正月匠監以書來致二帖云得之故

諫議大夫任古家

贊曰至誠動天中貫三極堂堂南陽繼以魏國山嶽  
鼎震江河釜溢羣生失寧乃見人傑大義既信人紀  
復植于晦冥中揭以日月操固漢賊敵禍宋祐萬段  
之礫吾恥未滌不共戴履矧肯屈膝祁山屢卻淮隴  
迭出非不拙沮之死靡易我觀史冊一公與匹功雖  
不同心則如一隆興至今耳目尚及遺墨之寶已若  
尺璧造次皆忠言猶未泐天維可絕地軸可折公心

之磨此理則熄兩朝開濟萬古閭閻繫此詩之以媿  
廟柏

李莊簡三字帖

行書  
九行

光懷息朝請即吳師直作吏能盡公廉勤三字通知財  
穀兵刑之要蓋實才也僕初昧平生頃在宛陵知之相  
隨累年建康以參議通判兩辟之命未下而僕以罪去  
今待遠關欲得一攝職以活幼望公稍以而吏事試之  
有不如所舉僕為妄人矣光再拜

右紹興參政李莊簡公光字泰發三字帖真蹟一卷  
泰禍烈矣元臣鉅公耆德碩彥俱罹正論之酷公家  
復再世以私史嬰重劾原奸臣之釁是不惟煽其虐  
于一時而實欲毀其傳于萬世雖然無益也節槩如  
漢李膺忠言如唐陸贄直道全德如九正韓呂劉范  
諸大老豈以一節之貶及史事故少詘哉珂家世同  
患難者也嘉定己卯與公孫知季同寅江左漕臺嘗  
刻公遺事于官寺敬仰高風每切歎息後四載實慶

乙酉之六月始得之帖于京口贊之以見尊鄉之心焉

贊曰秦禍滔天鯨淘九淵淪胥以顛而我謂不然如公之賢泰山巋然奔流百川何傷乎一卷野史所編人心之傳匪石則遷誰為之燎原兩家之先義比仲連覽此卷焉不知其涕漣

王敏節歡喜帖

行書二  
十四行

庶頓首上啓伯壽制置修撰友弟別久攀仰有不勝言



者私門多故去年喪妻今復遠謫何以為懷聞命離九江遠途酷暑臍腑暴下所至畱滯幾至危懼者數矣八十餘日方到貶所形體支離惟餘皮骨良所苦也平生不以官職為意從來褫職罹官多矣未若此番狼狽也蓋緣取名之多反有此阨奈何又所至為人睥睨當與之歡喜領畧兒子輩且令居德安緩急當就長沙奉依也或見德遠且與調護之然別無觀望人情當然故也此間如坐井中又五馬專尋下石以自求用所謂臧氏

之子也我之進退莫不有命此等何足較哉八郎且令  
為學其才雖不甚勇銳然忠實有守不害為賢者爾更  
望提耳訓誨之庶于此生進退一委之命餘希自愛為  
祝不宣庶再拜

右紹興樞密副使王敏節公庶字子尚歡喜帖真蹟  
一卷世之流坎何者非天公以高名勁氣事明主志  
節嶄然如百鍊鋼劫火不毀乃猶未能忘情于是亦  
足見當時搢紳之禍睚眦陰賊尚有烈于偃月者按

公以紹興壬戌六月壬申責嚮德軍節度副使居道  
州八月庚午薨于貶所計自謫命至薨纔六十日帖  
中八十字殆出筆誤所謂護者蓋公與張忠公獻在  
陝服有違言而有此疑五馬下石又出于初至卽墮  
逆境出門有礙不能堪處以迄于死耳放之歲月公  
至道曾無幾時薨後五十七日郡倅孫行儉猶以為  
公備行館之故謫廣南監當意出必于郡守之訐而  
檣之用心

案此下原  
缺八字

也執卷流涕彼何人斯公之口

史以寶度乙酉四月自江鄉來口口口口口口口是帖  
以示因丐得之

贊曰秦火燎原衣冠塗炭繞指之柔出乎百鍛如公  
之剛猶死憂患時歟命歟一覽三歎

翟忠惠秋杪帖

行書  
十行

汝丈叩首再啓秋杪台候不審安否何如伏惟具宜興  
寢方欲上狀候行辱損教重愧不腆顧彙然在疚無緣  
修敬跂望使乎良自喟歎

右紹興參政資政學士翟忠惠公汝文字公巽秋杪  
帖真蹟一卷迹奇行直學博用專在近世名臣惟公  
兼之以庶古人揚子雲心畫之論斷可識矣嘉泰壬  
戌十二月得之毘陵

贊曰態跌宕而奇偉姿高明而通詭此書得于其里  
茲可想其人矣

折樞密子友帖

行書  
六行

子友兄弟及王應仲日夕相聚每誦詠侍講詩文恨不

自日親教誨也子友貧甚宮祠之奉不足餬口旦夕例  
須罷推局愈窘急矣未知門下有以振之否湖外委輪  
乞示及彥質再拜

右紹興樞密端明學士折公彥質字仲古子友帖真  
蹟一卷予始配時侍先君漕輓湘南及識公之子知  
常帖得之是時蓋淳熙戊申歲

贊曰陝服之俗重于義公家府谷殆且百世予不能  
知子友之兄弟為謀而如已交情之不替亦足以見

前修之志

孫參政知命帖

行書  
九行

近到毘陵見一知命者獨謂參政十月安穩無他與諸人所說稍異今節氣已過大雪其獨驗而亦頗言自此坦履富貴功名之地非輦流所可及謾欲一聞近拜覆右紹興參知政事孫公近字叔詣知命帖真蹟一卷毘陵有士有携近世名卿帖甚多寶慶之元二月過予京口予閱笈中所無者得此

贊曰古稱君相不言命執國大政而猶拳拳于富貴功名之競其雖言獨應予猶以為病

何恭敏料理帖

行書  
五行

台眷上下伏惟均慶比來生事當不至不足閒居自不妨料理也久別極思一見而未繇諒亦自有此耳鑄再拜

右紹興資政殿學士樞密何恭敏公鑄字伯壽料理帖真蹟一卷予家被秦禍公獨首明其冤其特立之



操可想矣嘉定庚辰三月始得公帖于餘杭

贊曰虐焰熏天而公以勺水欲救其燎原觀公之帖雖久別之一見亦將以歸之時數之自然胸中所處者素定宜其敢于撓豺虺之鋒而吐天下之公言也

張章簡康寧帖

行書六行  
尾帖六行

綱上問尊丈承事伏惟壽體康勝眷集君休江右有需委毋惜垂論綱上問

去秋解維適犬犬小違和別來以僻尤杳不聞耗春巾

劉參議從者能言之云已康寧矣良以為善偶頭風不果親作書萬萬情案網拜

右紹興參政資政學士張章簡公綱字彥正康寧帖真蹟一卷書乃靖炎間間幅不知所與者為何人帖前乃史楷惟末批字帖為手蹟開禧乙丑四月予仕餉庾得此帖于金壇一士友家其上題為李忠定丞相書是時尚未識忠定字體信而藏之後得山谷覺民帖跋語字法書名與此無異復得忠定帖位置後

逸又不同而後知為公之筆士友家于與公同鄉粉  
蓋其前世所傳久而萬知其倪者也帖中有江右字  
公平生宦游不涉其境豈靖炎間避地所遇抑持江  
東憲節時所作書誤謂鄱江為江右耶

贊曰予官京口前後十年接公之粉榆兮讀者舊傳  
慨想其人莫覩其居兮維帖之得題標失真蹟以迷  
其初兮覺民跋證莫近斯予以識公書兮

趙德麟召還詩帖

行書  
九行

被責三十年蒙恩召還在方行駐蹕錢塘書呈子常侍  
郎一首

三十餘年一夢同向來朝士盡沈空如今白首趨行闕  
不是當年長樂鍾

右紹興開府儀同三司安定郡王趙公令時字德麟  
召還帖詩真蹟一卷予始識公書多跋語附他卷後  
紹定戊子三月始得此于京口詞簡義正藹然有承  
平王孫感慨宗國之意云

贊曰昔東晉王茂弘諸人登新亭望長淮自謂風景  
不殊舉目有山河之異至今想之猶鬱乎其有餘哀  
矧預瑤牒登玉階而寄宋國之懷者耶王業偏安于  
海瀕故都久棄于蒿萊主議者方貪天之功而肆其  
雄猜朝士沉空不復向來率兆乎滔天之讒而迄乎  
和議之開此有志者所以歎于嗟之麟而思當道之  
豺也嗚呼鐘簾百年遶塵尚靈悠悠蒼天彼何人哉

周少隱留春詞帖

行書  
六行

春似酒杯濃醉得海棠無力誰染玉肌豐臉做淺紅顏  
色送春風雨最無情吹殘也堪者何似且留花住喚小  
鬟催拍

右紹興左司郎中竹坡居士周公紫芝字少隱留春  
詞帖真蹟一卷予少從公之孫貢士去病游因藏此  
帖時慶元乙卯歲嘻今三十有四年矣

贊曰絃管之流聲景物之感情激微含商書華發英  
固所以合融怡于自然而惜流轉之不停亦猶夫見

穿花之蛺蝶賦點水之蜻蜓思盡醉于風光而典春  
衣于杜陵也

張忠文奉告晴快二帖

並行書第一帖九  
行第二帖六行

九成頓首上啓奉告竊審還自山中尊履萬福慰喜無  
量新詩見屬淒婉清壯足為巾篋之光來日如清賞避  
逅于梅山矣豫以為喜不宣九成頓首上啓長丈刪定  
學士賢友

九成頓首上啓晴快竊審尊履萬福新詩寵和用事切

當運意巧妙極慰鄙懷也面謝不宜九成頓首上啓長  
丈刪定學士賢友

右紹興禮部侍郎侍講敷文閣待制無垢先生張文  
忠公九成字子韶奉告晴快二帖真蹟一卷先生道  
德風誼文章氣節卓為南渡冠冕接中朝諸老之派  
開終學典型之宗富貴不淫流落無悔正誼自信全  
名爛然炎興而來一人而已九江有故幹辦軍頭司  
劉君必達于先生之孫厚為姻家藏遺墨數帖實心



如拱壁弗可得也珂十二三時嘗見而識其體寶慶  
乙酉六月在京口與西淮副帥司幹官潘君忠恕夜  
避暑萬歲樓下出首帖以示驚歎初見恰三十年矣  
尊慕所存遇必有合夫豈苟得乎哉是時上初嗣位  
首詔贈先生龍圖學士仍賜諡後兩月先王亦叨易  
名忠武之命先生繼加贈太師啓國子崇諡曰文忠  
蓋皆初政第一義云次帖紹熙戊子得之蕪臺故家  
贊曰上嗣服之初載首以忠之一字褒顯邦之臣二

人亦既表百年之宗儒遂復開千社之舊勲嗚呼英  
衛善用兵房杜濟以文惜先生之位弗克究故先世  
之志亦終莫之伸也遺帖之存手墨如新我藏孔宜  
對于褒綸

米元暉書簡帖

七帖並行書第一帖十六行第二  
帖第五帖各十二行第三帖十四

行第四帖九行第六帖七  
行第七帖三行尾批八行

友仁惶恐再拜昨晚幸承教不勝欣慰奉手字審晴和  
台體沖勝可量感喜所喻何其蔽也不足觀不足觀緣

此一事大見撓緣數人爭欲取之今渠云且已與誰則  
是要俟此老不在後拈出必可了身計當亦不遠矣和  
篇奇甚奇甚公主誌刻令人尋得納上論字語謾上呈  
因以示仲季諸豪未及瓜間定納所示豈敢食言文字  
切與垂念如是則必可受厚德矣不宣友仁惶恐再拜  
長文提宮學士尊親

汝宜省脫著衣嘗切須謹慎第一不得失飢常早歸喫  
飯千萬千萬吾老業離家生受生受就請受養家成甚

情況汝輩安坐豈知吾辛辛勤今付安人藥便令圓  
好好收藏并附子四箇是入汝喫藥中少此四箇附子  
未摘末者半料切記不要差誤餘切將息將息安人十四娘新  
婦與兒同此押付韓師 姑夫買柴時同買下米賤時  
亦買下月用錢續寄去

友仁頓首再拜師德府判少尹兄使座春晚氣暄卽日  
伏惟還家安居百況無不自適友仁衰蹇如此迺者曲  
荷獎授大賜使百指又復粗飽知德之心未易論報稍

茲隔閭可勝馳情友仁勢須俟從舊迎新一跌事了乃  
謀去就咫尺未卜良晤伏紙不勝悃仰餘惟萬為遠紫  
珍重不宣友仁頓首再拜師德府判少尹兄使座三月  
二十九日

友仁頓首凝寒伏惟起居佳勝朋尊奉納以祝新歲耆  
壽微愧微愧前者人即送去云鄭待郎昨日又送一名  
俟契勘先後也知之乏人奉報不罪不罪不宣友仁頓  
首上幹辦秉義鄉舊

友仁頓首去冬隨羣出關遑遽狼狽不可言旣到新昌  
偶大水浸田食旣不足斗米忽千錢不得已東來府主  
憐之使竊食于此然與臨安所得之半而已欲徑復至  
舊巢大暑不能動中元後定成行遑遑奔走亦可太息  
不謂晚境蕩掃田廬乃有平原食粥之憂生平習懶之  
方且低昂于世其苦不可言友仁頓首

令人以次寶眷伏惟一均慶仲謀季寬承務諸仲季  
幾人赴官附此道意友仁五口在此六口在新昌成甚

家計友仁拜問

慶門仙聚各計均納多祥而曹荷問及此有可委千萬  
示諭也友仁拜問

此紙極有古意而不合硃俗惡山水遂用紙背蒙寄糴  
薑深荷厚意人還遽不能致土毛徽墨絕品五圭護以  
為報不罪不罪涉夏入秋老稚多不快今日偶請假乃  
卽得作此陪醫無況無況

右紹興歎丈閣直學士米公友仁字元暉書簡帖七

幅真蹟一卷惟寶晉以博雅名家公漸摩異聞傳昇  
心法故書跡類有寶晉法度如渥洼生駒脫羈教駢  
顧景奔塵相與後先不翅一日千里至于歷瑤池望  
崑崙逐電籥雲流沙青海飄忽一瞬則亦瞠若乎其  
後矣喜定庚午歲八月予在故府有客袖斯書以示  
因相與論公家傳之學大槩如此客然予言舉以遺  
予因得繫寶晉之次公之能不特賞鑒與字體其畫  
蹟文章皆高睨一世宣和間寶晉嘗上公所作楚山



清曉圖誌之天府山谷為作字授以古篆印且贈詩  
曰虎兒筆力能扛鼎教字元暉繼阿章時謂不誣公  
字聯元本以晞王門父子尚寶晉之意

贊曰父子而善書自義獻而始也寥寥千載固已莫  
之擬也至于我朝有楚國之芊也不殞其名雖未濟  
厥美也其讀父書亦非括之比也瞠乎望洋混混猶  
比水也此帖之觀尚可見其體也

米元暉韓退之五箴帖

行書五十七行尾記二行  
又自跋二十三行徐兢題

草書十

二行

韓退之五箴并序

人患不知其過既知不能改無勇也予生四十有八年  
髮之短者日益白齒之搖者日益脫聰明不及于前時  
道德日務于初心其不至于君子而卒為小人也昭昭  
矣作五箴以訟其惡云

游箴

余少之時將求多能蚤夜孜孜余今之時既飽而嬉

早夜以無為嗚呼予乎君子之業而小人之歸乎

言箴

不知言之人烏可與言知言之人默焉而其意已傳幕中之辯人反以為叛臺中之評人反以為傾汝之懲耶而呶呶以害其生耶

行箴

行與義乖言與法違後雖無害汝可以悔行也無邪言也無頗死而不死汝悔而何宜悔而休汝惡曷瘳宜休

而悔汝善安在悔不可追悔不可為思而斯得汝則弗思

好惡箴

無善而好不觀其道無悖而惡不詳其故前之所好今見其尤從也為比舍也為讎前之所惡今見其戚從也為愧舍也為狂維讎維比維狂維愧于身不祥于德不義不祥不義惟惡之大幾如是為而不顛沛齒之尚少庸有不思今其老矣不慎胡為

知名箴

內不足者急于人知需焉有餘厥聞四馳今日告汝知  
名之法忽病無聞病其昱昱昔者子路惟恐有聞赫然  
千載德譽愈尊矜汝文章負汝言語秉人不能揜以自  
取汝非其父汝非其師不請而教誰云不欺欺以賈憎  
揜以媒怨汝曾不悟以及于難小人在辱亦克知晦及  
其既寧終莫能戒既出汝心又銘汝前汝知不顧禍則  
宜然

紹興乙丑中冬元暉為汝丈書

僕宜和之末與道山二國自同修于寶堂兼掌書學二年餘是時日得親筆硯如蘭亭修禊序為諸生迫使臨寫百餘本至今有出以示者稍亦可觀爾後遑遑奔走營哺之不暇豈復與管城氏周旋獨書簡不得已而事之所作字多不足觀交游見迫寫成往往自擲去汝丈以此索字偶隣右大藝之後冗長箱篋悉寄北關空闕竹圓中諸毫不應手作字又紙乾澀不能運墨如人意

愧無足觀也友仁上

見詢廣中幹至荷已屢說英石如有真山之狀可以作  
筆格者并檳榔軸作土毛不厭其呵呵

宣和壬寅歲復置書學今元暉侍郎唐稽禮部暨愚三  
人同應選迄今二十有六年矣唐稽沒于京師丙午之  
難元暉今持從橐獨愚退處江湖築室龜峯弋水之上  
霞殮雲臥持自是一種樂云今觀元暉法書得元章妙  
處詩所謂是以似之者歟紹興丁卯夏五月晦徐兢題

右米元暉書唐韓昌黎五箴帖真蹟一卷宣和書學  
博士徐兢跋于後卷有十印皆是米氏後有徐氏二  
印元暉一印字特古雅豈三谷所遺者耶嘉定庚午  
歲八月與諸帖同得之

贊曰古之大儒立言以自箴蓋不惟視其身斯亦有  
警世之心如彼元暉困于書淫平生之于蘭亭嘗一  
日而百臨是自歎其用力之深矣跋之者又謂宣和  
三博士同時賜佩矜更二十有六年而蹤跡各異于



升沈噫噉二君其亦自念道德之不負而齒髮之侵  
乎抑亦不病其昱昱而惟有冀于知音乎抑蘭亭有  
言不在乎今之視昔而悲乎後之視今予意二君亦  
猶傳虛扁而誦其神奇實未始道脈絡而知砭鍼也

米元暉秀軒詩帖

行書  
七行

王寅仲索余書秀軒詩四句于榜之側

山氣與湖光四時足殊秀我識軒中人是為益三友

吾此詩大有古人之造妙處

右米元暉秀軒詩帖真蹟一卷秀軒不知何在山氣  
湖光其為東南之勝審矣慶元戊午八月予在洪試  
漕臺有特此書售于市莫或識者予贖而歸後橐羣  
帖因褫而藏焉

贊曰山氣之微明湖光之清浚軒中之人秀而隱予  
固未之綸獨是一篇之題自是于古無所與遜知益  
知損予意猶有儷乎孔門為國之哂也

米元暉陽春詞帖

一十八首並行書第一第二第  
九首各九行第三第四首各七

行第五第七第十第十六第十七首各十行第六  
第十三第十八首各八行第八首六行第十一第  
十五首各十七行第十二第十四首各  
十一行尾記一行跋題一行

臨江仙

昨夜扁舟沙外艤  
淮山微雨初晴  
斷雲飛過月還明  
一天風露重  
人在玉壺清水際  
不知何許是遙林  
口辦微  
青醉迷歸夢  
強口凌誰言東去鴈  
解寄此時情

小重山

醉倚朱欄一解衣  
碧雲迷望眼  
斷虹低近來  
休說帶寬

圍人千里還是燕雙飛  
深院日初遲綺總簾幙靜恨生  
眉不堪虛度是前時鴻來速爭解寄相思

減字木蘭花

柳塘微雨兩兩飛鷗來復去倚遍重欄人在碧雲山外  
山一春離怨日照綺牕常幾線酒病情魔兩事春來無  
奈何

點絳脣

浩渺湖天酒浮黃菊攜佳侶澹烟疎雨去魯方懷士傾

蓋相逢引滿哦奇語山圍處兒觥頻舉不醉君無去  
漁家傲

從古荆溪名勝地溪光萬頃瑤瓊翠極望荷花三十里  
香噴鼻我舟日在花間艤向晚餘霞收散綺遙山抹黛  
天如水滿引一樽明月裏風微起蕭然真在華胥氏

阮郎歸

小舟載酒向平湖新涼生曉初亂山烟外有還無王維  
真畫圖風遂起動襟裾雨來荷澦珠一樽相對喜君俱

醉歸紅袖扶

臨江仙

一曲陽關腸斷處  
臨風慘對離樽  
紅妝揭調十分斟  
古來多聚散  
正似嶺頭雲  
昨夜晴霄千里月  
向人無限多情  
娟娟今夜滿虛庭  
一帆隨浪去  
卻照畫船輕

醉桃源

蝶夢初回栩栩柳  
岸幾聲鶯語  
蘋末起微風  
山外一川烟雨凝  
顧凝顧人在玉壺深處

南歌子

遇酒詞先舉逢山眼暫明  
一川風雨縱留人不道此郎  
歸與欲兼程客久情深口  
尋覓恨不能絕牀頓睡夢縱

橫賴

案此下  
原缺

和晏元獻漁家傲韻

郊外春和宜散步百花之上初凝露  
福地神仙多外府  
藏奇趣幽尋歷遍溪邊路  
薄宦浮家無定處  
萍飄梗泛  
前人語與子未須鄉國去  
來同住且看羣岫烟中雨

念奴嬌 村居九日

九秋氣爽正溪山雨過茅簷清暇籬菊耕英知是為佳  
節重陽開也色妙香殊勻浮甌面俗狀卑金竿歌狂飲  
俊滿簪還更盈把村外草草杯盤邊塵不動欲買應無  
價端使晴霄風露冷雲卷烟收平野向晚嬋娟半輪斜  
照想見成清序玉山頽處要看欹帽如畫

臨江仙

寶晉軒牕臨望處山圍水遠林榮不堪回首到江城牆



跌圍无礫鷗鷺見人驚日願太平歸舊里更無餘事關  
情小營茅舍倚雲汀四時風月裏還我醉騰騰

阮郎歸

碧溪風動滿文漪雨餘山更奇淡烟橫處柳行低鴛鴦  
來去飛人似玉醉如泥一枝隨鬢欹夷猶雙漿月平西  
幽尋歸路迷

臨江仙

野外不堪無勝侶笑談安得君同四時景物一壺中醉

餘臨望處遠岫數重重溪上新荷初出水花房半弄微  
紅曉風蕭爽韻疎松娟娟明月上人在廣寒宮

念奴嬌 裁成淵明歸去來辭

欄干倚處戲裁成彭澤當年奇語三徑荒涼懷舊里我  
欲扁舟歸去鳥倦知還寓形宇內今已年如許小牕容  
膝要尋情話親侶郭外粗有西疇故園松菊日涉方成  
趣流水涓涓千澗上雲遙奇峯無數窈窕經丘風清月  
瞭時看烟中雨蕭然巾岸引觴寄傲衡宇

醉春風

一陽來復羣陰往吾道從今長萬事莫關情月夕風前  
依舊須臾放鄉雲舒卷浮清嶂從古書珍賞滿引唱新  
詞春意看看又到梅梢上

小重山

雨過風來午暑清榴花紅照眼向人明一枝低映寶釵  
橫菖蒲酒玉枕十分斟引滿聽新聲小軒簾半卷遠山  
青幾人閒處見閒情醒還醉為趣妙難名

訴衷情 淵明詩

結廬人境美陶潛車馬不來喧勝處自多真趣飛鳥日  
相還心既遠地仍偏見南山手持菊潁山氣長佳欲辦  
忘言 皆吾所作詞 元暉

紹興戊午中春初七日懶拙道人得守滁陽既老則懶  
遂請宮投閒泛小舟來平江大姚村過謀之于莊舍乍  
朝來居深村灑然如濯清風于三伏畏暑中其為快有  
不可勝言者大恨未能增置百斛尚依微祿以哺挈稚


未能便納政為閑客相從雲水間耳豈非老業家女婿  
索書此柔毛頑悍作不成略無可觀是月十三日押

陽春集

右米元暉書自作詞十八篇名陽春集二冊紹興戊  
午中春在姑蘇別墅為其女甥所寫老時近班歸藝  
松菊猶不能忘情于翰墨間斯亦足以見嗜好之篤  
矣寶慶丙戌二月之得中都劉氏

贊曰予家有山林集觀寶晉自製之詞每不逮乎平

鼎得過庭之異聞陶冶性情自為陽春既寓意于館  
甥亦祕笈而自珍于嘗商略函書髣髴梁塵規矩合  
作勾簫奪倫竊以為夫君金縷之衣亦未足以換墨  
練之裙也



寶真齋法書贊卷二十四

# 欽定四庫全書

子部

寶真齋法書贊卷二十八

詳校官中書臣孫溶

編修臣程嘉謨覆勘

總校官候補中允

臣王燕緒

校對官庶吉士

臣潘紹觀

謄錄監生

臣吳熙春



欽定四庫全書

寶真齋法書贊卷二十五

宋 岳珂 撰

宋名人真蹟

潘子賤改月帖

行書  
九行

良貴叩頭上啟改月伏惟尊候萬福引嚮引嚮良貴即  
今過南山作少綠事中秋後方歸恐左右旦夕須差考  
校無由候別不勝悚仰謹布此區區秋暑方熾十萬珍

愛不次良貴叩頭上啟文伯教授學士賢友侍史初三

日

右紹興徽猷閣待制潘公良貴字子賤改月帖真蹟  
一卷公勁正之操聞于一時字畫之存雖近猶可敬  
也嘉泰癸亥十月得之臨江之彭氏

贊曰公立柱下直聲凜如氣則不餒而況于書侍人  
以情真意浹洽于嗟前修動則可法

胡已茂鶚章帖

行書十  
二行

交修惶恐再拜上啟少懇輶塵嚴聽從姪蒙備員德清  
丞吏事明敏公勤潔廉胥吏畏戢甚得民譽頃左右剖  
符之初嘗令揭見于臨安已蒙清顧方此薦士之初輒  
敢求玷鶚章之末逮此終更獲選改秩皆出門下之賜  
載德豈淺淺耶敢恃眷舊之私特加留念幸甚干冒愧  
悚殆不勝云交修惶恐再拜上啟

右紹興端明殿學士胡公交修字已茂鶚章帖真蹟  
一卷自薦舉之失初意晉之祁奚本朝之曹呂蓋世

金少日人三  
卷二十五  
以藉其口而售其私者以古自信庶幾乎中興之人  
物見之帖得之京師寶慶元面之八月

贊曰贈繳之冥鴻人心所同是內舉者何足以害其  
公世道之趨或汙其隆此帖之存所以愧今日之懂  
懂

向伯恭旁午帖

行書  
十行

予謹惶恐再拜請建鈞席倏爾兩月不勝瞻仰之情乍  
到官所賓客旁午應酬不暇念欲上狀少謝前延遇之

意執筆輒已屢矣洊蒙寵賜手教仰服眷厚且愧不敏  
耳大參虛位側聞環召復歸廟堂以福四海子謹惶恐  
再拜

右紹興戶部侍郎徽猷閣直學士薌林向公子謹字  
伯恭旁午帖真蹟一卷予少侍先君帥東廣道出清  
江嘗登薌林之麓後十五年與公之孫公起公謹游  
屢見手墨又十四年寶慶乙酉六月始得此帖于京

江

贊曰塗水連漪未改薜林風月如新一紙重觀遺蹟  
百年無復斯人

劉彥修江岸帖

楷書十  
五行

子羽頌首再拜上啟侍講內翰台座江岸請違載更歲  
籀景仰德阻與時俱積謁歸故棲繼之行役擾擾多事  
疎奉起居春寒伏惟論思餘閒神明協相台候動止萬  
福子羽歲暮抵漫陵交郡事海邦僻遠民淳訟稀竊祿  
養親誠為安便正阻清覲願言加慎禰鼎益隆眷注謹

拜手狀不宣子羽頓首再拜上啟侍講內翰正月七日  
謹空

右紹興徽猷閣待制劉公子羽字彥修江岸帖真蹟  
一卷公自徽猷閣待制守泉在紹興丙辰歲是時翰  
苑蓋朱公震陳公與義朱方勸讀則公所與書陳其  
人也嘉泰壬戌歲七月得之都城士人錢萬

贊曰其忠足以繼忠顯其教足以傳西樞其略足以  
佐魏公其識足以知二吳於孝斯亦足以列寶真之

儲矣

梁仲謀去月帖

草書十  
九行

汝嘉惶恐去月二十八日以辰子得奇疾不幸二十九日劉丈見過告以廟堂呼召分委職事方知淮甸已擾次日得旨促出自此不復更得少暇修人事亦不得略為亡兒取日作佛事一切付之牙校輩相繼報益急遂議挈家三數日來挈累既行府事遽交與章丈方少通氣得親書問耳不審得見重否即日伏惟開府之初神



相起居台候萬福不勝瞻仰惓惓之至汝嘉初得指揮  
獨以本部事從行繼得與劉丈同行指揮今又獨行矣  
終當率劉丈同行也啟行未有定日間已擬二十三日  
又聞二十九日相君云有警即動不許擇日也餘已具  
劉丈書中更不縷縷向寒乞相時珍重以俟寵數不宣  
汝嘉頌首再拜知府徽猷侍郎鄉兄台座

右紹興寶文閣學士梁公汝嘉字仲謀去月帖真蹟  
一卷予開禧甲子冬初筮仕南徐公之子李璵實以

九卿總餉尚及見典型帖得之其門人鄭子壽蓋或  
持以獻者

贊曰當邊境之多虞士君子出而備馳驅見于盈咫  
之書觀其六鑒之行雖擇日亦不可以少須其時為  
何如燁燁出車投袂以趨毋寧以家而忘此勾奴豈  
其私是圖此敵愾之士必即是以察忠臣之區區也

魏邦達聖訓帖

行書十  
四行

缸惶恐再拜知府侍郎徽學台座拜達未一月馳仰已

窮即日恭惟下車布政台候萬福缸以面奉聖訓略至  
劉候軍前取道治境拘文故不敢拜謁又事煩亟不欲  
少駐告借一知路人問徑道或云須由四安廣德而往  
或云自長興有水路尤便聞劉在太平或在建康惟欲  
取疾耳缸所乘舫子稍大遂至崇德易一小舟而來然  
復太小欠伸不能使府或有可至四安或長興者小舫  
子欲易以往無之即已不敢必也咫尺不獲少承誨益  
愧悚之劇舟次姑布執事不宜缸惶恐再拜知府侍郎

金史卷之八  
卷二十五  
徽學台座

右紹興吏部侍郎集英殿修撰魏公砵字邦達聖訓  
帖真蹟一卷事讎之議初起公獨以綱常折其鋒竟  
以坎壈去國名節巍然嚴霜皜日猶可想也勾黨浸  
淫異軌同轍覽卷追慨為之憮然寶慶乙酉六月得  
于京口

贊曰意有不可束帶之立弗與也事所當盡抗筆之  
急弗顧也詩不云乎駉駉征夫每懷靡及覽此遺墨

斯足以觀君子之于役而攷古義于原隰矣再拜什  
襲噫吾何執

汪彥章譽望求賢薦書三帖

並行書第一第三帖  
各六行第二帖五行

藻頌首啟承聞譽望固非一日衰遲宦遊莫遑膽對第  
馳欽詠昨者劉君汝一能言執事嘗及姓名即欲寓書  
因循至今負媿深矣藻方負隨屏迹丘園趣舍殊途未  
有馳謁之日臨紙為之太息藻再拜

藻頌首啟下車今已幾時政譽藹然良用欽歎求賢如

此雖公不薄淮陽士論謂何佇聽詔除庶幾善類知所  
激厲焉藻再拜

藻頓首啟小兒快負丞獲預奔走之列天予之幸也昨  
朱守嘗許其刻章未幾罷去聞當補發輒欲預薦書之  
末雖未果少接色辭所以冒聞者臭味同焉惶恐藻再  
拜

右紹興翰林學士龍溪先生汪公藻字彥章譽望求  
賢薦書三帖真蹟一卷中興嗣命之臣公為稱首翰

墨所傳與文章稱其可尚也已予家九江道如行京  
屢出黥歛間知公故家所在訪求公帖慶元己未歲  
八月得之文溪士人汪氏

贊曰納交以道不殊乎丘園觀政以人歎息于求賢  
言情以真無事乎角肩此前輩之流風今不復見者  
幾百年矣使覽者楚然曰古道之存存乎尺箋盍思  
乎免旃則如寶真者亦將預有榮焉

朱文靖報稱帖

行書十  
四行

倬久不聆動靜殊用思企奉手翰之辱從審霜寒台候  
萬福感慰感慰倬叨預機政日思報稱未職故人宥以  
垂教否因風幸冀不外令嗣已庸新命想深慶慰迫冗  
草畧奉復悚仄悚仄合并未期更冀順時調獲以需晉  
寵奉頌之至十二月日倬劄子

右紹興宰相朱文靖公倬字漢章報稱帖真蹟一卷  
近世字法宰傳如公以鼎鉉之貴兼翰墨之妙片紙  
之存皆可祕襲帖得之金沙士人陳元穎實嘉定士



午六月

贊曰勁而柔端而道奔八驥回九牛功玉鉉名金甌  
藏此書識前修

劉無言餉茶帖

行書  
五行

餉茶畧一閱皆精緻不俟點試可見也花子井通應佳  
味併煩分惠尤用感作區區面謝生客草草素頌肯

右紹興祕閣修撰劉公燾字無言餉茶帖真蹟一卷  
建中靖國初祐陵手賜絡錢十五萬刊祕閣續帖重

輯名跡以踵元祐右文之規以紹淳化詒謀之列公  
是歲為宣德卽正字班在館閣之末獨被旨專董斯  
刻且書標目及事因于後蓋書名已動九重之聽久  
矣然而官獨連蹇不大進至宣和末猶止寓直中祕  
而已豈抱至藝者不肯輕售耶山谷謂使公春秋高  
江東又當出一羊欣薄紹之斯言猶信嘉定甲戌八  
月得此帖于蕪門僧顯時

贊曰筆勢之偉筆意之詣筆法之粹是三者固足以

名家而無愧矣於庠祐陵天縱八體公蒙識拔獨在  
初歲亦宜其有此具美也寶此幅紙以見太平之游  
藝惟祕閣是視

劉無言輞川詩帖

二十題共四十首有序並行書  
一百行後四題大字標詩八首

分八行小字注又  
劉見紀華書三行

尚書右丞贈祕書少監王維摩詰

余別業在輞川山谷其游止有孟城坳華子岡文杏館  
斤竹嶺鹿柴木蘭柴萸汴宮槐陌臨湖亭南垞欽湖

柳浪樂家瀨金屑泉白石灘北垞竹里館辛夷塢漆園  
椒園等與裴迪閒暇各賦絕句云

孟城均

新家孟城口古木餘衰柳來者復為誰空悲昔人有  
結廬古城下時登古城上古城非疇昔今人自來往

裴迪

華子岡

飛鳥去不窮連山復秋色上下華子岡惆悵情何極  
落月松風起還家草露晞雲光侵履跡山翠佛人衣

裴

文杏館

文杏裁為梁，香茅結為宇。不知棟裏雲，去作人間雨。

迢迢文杏館，躋攀日已屢。南嶺與北湖，前看復迴顧。

裴

斤竹嶺

檀欒映空曲，青翠漾連漪。暗入商山路，樵人不可知。

明流紆且直，綠篠密復深。一逕通山路，行歌望舊岑。

裴

鹿柴

空山不見人，但聞人語響。返景入深林，復照青苔上。

日夕見寒山便為獨往客不知深林事但有麝麝跡

裴

木蘭柴

秋山斂餘照飛鳥逐前侶彩翠時分明夕嵐無處所

蒼蒼落日時鳥聲亂溪水綠溪路轉深幽興何時已

裴

茱萸泝

結實紅且綠復如花更開山中儻留客置此芙蓉盃

飄香亂椒桂布葉間檀樂雲日雖迴照森沈猶自寒

裴

宮槐陌

仄運蔭宮槐幽陰多綠苔應門但迎掃畏有山僧來  
門前宮槐陌是向歌湖道秋來山雨多落葉無人掃

裴

臨湖亭

輕舸迎上客悠悠湖上來當軒對尊酒四面芙蓉開  
當軒彌澗漾孤月正徘徊谷口猿聲發風傳入戶來

裴

南垞

輕舟南垞去北垞森難即隔浦望人家遙遙不相識  
孤舟信所泊南垞湖水岸落日下崦嵫清波殊淼漫

裴

歌湖

吹簫凌極浦日暮送夫君湖上一迴首青山蒼白雲  
空闊湖水廣青雲天色同艤舟一長嘯四面來清風

裴

柳浪

分行接綺樹倒影入清漪不學御溝上春風傷別離  
映池同一色逐吹散如絲結陰旣得地何謝陶家時

裴

樂家瀨

颯颯秋雨中淺淺石溜瀉跳波自相濺白鷺驚復下



瀨聲喧極浦沿涉向南津  
汎汎鳬鷗渡時時欲近人

裴

金屑泉

日飲金屑泉少當千餘歲  
翠鳳翔文螭羽節朝玉帝

滌滄澹不流金碧如可拾  
迎晨含素華獨往事朝汲

裴

白石灘

清淺白石灘綠蒲向堪把  
家住水東西浣沙明月下

跂石復臨水弄波情未極  
日下川上寒浮雲澹無色

裴

北垞

北垞湖水北雜樹映朱欄迤迤南川水明滅青林端

南山北垞下結字臨歌湖每欲採樵去扁舟出菰蒲

裴

竹里館

獨坐幽篁裏彈琴復長嘯深林人不知明月來相照

來過竹里館日與道相親出入為山鳥幽深無世人

裴

辛夷塢

木末芙蓉花山中發紅萼澗戶寂無人紛紛開且落

綠堤春草合王孫自留畱況有辛夷花色與芙蓉亂

裴

漆園

古人非傲吏自關經世務偶寄一微官婆婆數株樹

好閒早成性果此諧宿諾今日漆園游還同莊叟樂

裴

椒園

桂尊迎帝子杜若贈佳人椒漿奠瑤席欲下雲中君

丹刺罥人衣芳香留過客幸堪調鼎用願君垂採摘

裴

予每見右相輞川圖想見其處復于其集得此詩尤想  
見其人風度高絕非復世人也裴迪在唐無聞而其詩

如此抗衡摩詰則其人亦可知矣偶有繭紙一軸大小字書之僅足以見余景慕不忘之意 無言

右劉無言輞川詩帖真蹟一卷輞川奇勝甲唐世名  
墅聚觀諸詩亦可想已予舊藏唐人所繪圖每暇日  
一縱覽飄飄然若身在華岡北垞間今見此蹟筆力  
清勁與詩韻頗是可與圖並甲祕笈矣得帖之日寶  
慶乙酉十月售者錢氏

贊曰輞川之勝新詩之詠所以適性也繭紙之瑩筆

力之勁所以寫興也維詩與筆景物交映也並于唐  
圖于是為稱也

呂居仁瞻仰收召二帖

並行書第一帖十四  
行第二帖十一行

本中再拜比稍不聞動靜瞻仰之至即日伏惟尊候萬  
福本中久留閩中比已治北去計復被召命顧自春多  
病日頗增劇須俟旬日稍閒乃行衰羸如此亦復何用  
前路當懇求宮祠再任期必得請或見諸公敢乞先致  
一言張本至幸尚阻侍見倍乞為時護重不備本中再

拜徵猷侍講姑夫淑人四十七姑座前四月二十八日  
本中拜覆收召雖出推獎然本中衰病不堪苦冒昧求  
進必致顛躓將來自陳尚乞垂意不能者止聖人明戒  
亦或不辱題品萬分之一矣其他覲縷當俟後狀曾壻  
到行朝請見敢乞矜憐六哥十哥續別作書大同包上  
起居本中拜覆

右紹興中書舍人直學士院呂公本中字居仁瞻仰  
收召二帖真蹟一卷中原文獻之傳如呂氏一門道

德文章世載厥燬固難乎析薪之責也公在南渡後  
歸然靈光尊王賤霸之一語著于王言天下凜然始  
知有大義其正人心扶世教功不淺矣所謂負荷復  
何議哉嘗攷史錄見史臣秦熈之言曰紹興四年三  
月秦檜拜右相議和之計決矣而左相趙鼎抑沮甚  
力因修史加恩密諭直學士院呂本中為制詞益豫  
為後日奸圖鼎為首相不復留意國事用兵則徒擅  
都督之名略無措畫議和則陰懷首鼠于進對之際

未嘗有可否陰結黨與肆為詆欺其負眷意如此於  
虐天下有公是非如公之不匿厥指顧可以為証乎  
帖得之高平范氏難進之風溢于盈咫之幅計其歲  
月當在公賜科第還行都時百年聲猷槩可覘矣紹  
定之元上巳日予修禊研山而帖適至

贊曰呂氏一門我朝韋平衣冠既南孰為典刑猗歟  
北扉翰墨騰英難進之風藹于心聲其進維何風雷  
隱砰賤霸尊王萬古作程天將開之以豁牘盲孰遏



其萌維盜竇憎觀公初心何止懲羹親朋斯升方喜  
秉征私書之詒猶欲卻行豈願空言與乳臭爭道之  
將宏非人所能俛首事雖衆方若醒詎知禍胎自漢  
公卿淪胥一談大呂為輕綸音一頒四海疎吟臧宮  
鳴劔賈祖請纓書下奉天已識中興曲筆誰歟反肆  
譏評陰險何知雲收霧明公帖初獲我心未寧謂彼  
嚙啗臆度以情是或鼠腐猶疑鴻冥既見公書懇懇  
至誠視彼儻來雖寵若驚肯以王言屈于奸朋公義

既昭公論既明迨今百年猶歟混井時歟數歟迄莫  
我聽公帖雲煙公心日星彼犬之狺何吠非形天澄  
氣清脩竹蘭亭閱此帖焉對于汗青

李商老酬答詩帖

行書十  
二行

謹次高韻奉酬禹功司錄博士彭再拜

煙霞痛疾自藏身刮膜頻窺佳句新學博還同杜候庫  
才慳深愧庾郎珍倚風終日掃松徑披霧何時對玉人  
西掖鑒坡須妙手如公那復困無津

右江西詩派日涉居士李公彭字商老酬答詩帖真蹟一卷詩派詩蹟未登于寶真丙戌八月始致此帖于賜山蓋託士友搜訪而得之者有藏書家七印贊之以備詩體之一焉

贊曰九派之沕滴注于溟渤寓此詩筆烟霞之痼疾園涉以日紆寫盤礴予于西江搜抉遺軼備體之一

陳文正黃庭帖

楷書  
十行

康伯惶恐頓首再拜上覆康伯輒有少意于稟近搜訪

得褚河南小字黃庭經一卷雖未辦真贋要似非近時  
墨蹟仰恃眷私率爾持納為書府之玩儻賜指留不勝  
萬幸郡中馬氏有唐盧梭迦高僧畫像乃禁中舊物印  
記頗多上亦有唐寶今已依近降指揮收買專人申納  
太師公相府亦乞鈞照康伯惶恐頓首再拜上覆

右兩朝相國維師魯國陳之正公康伯字長卿黃庭  
帖真蹟一卷海陵煽凶九垓沸騰封豕長蛇薦食上  
國瞰然有投鞭必渡之志維時元臣鎮物如謝安効

忠如陸贄輔聖斷如裴度佩安危如郭子儀在公一  
身吾國九鼎然則楊休玉色正笏垂紳之氣象固可  
即遺墨以占之也是帖蓋與秦燬者當是知漢川時  
孽焰滔天雖如公者猶不免于避礙致曲此則重可  
歎也嘉定辛巳四月得之建鄴秦氏致之者亦市買  
卒顧姓云

贊曰隆興聖主臨盛朝元臣堂堂冠蟬貂鎮撫百度  
服天驕九鼎安固屹莫搖凜然遺墨松後凋美錦不

楊璞不雕百年攸燿均童妖惜我喬木屈艾蕭園基  
賭墅意自消後來偉蹟可岩峴我來鄆鳩烏焚巢乃  
見拱壁汚脂膏卷藏再拜刻琰瑤百花藩溷隨飄飄  
願續洛階從午橋不問處所知春饒

史忠定蚤作帖

草書  
六行

浩再拜上履辱教伏審蚤作尊候萬福示諭若詢之在  
渠想無不可者萬一求之不得無如之何不可不問也  
是亦一機會幸裁之紙札不精望恕之浩再拜上履周

犬祕省賢友座前

右興隆相國太師越國史忠定王浩字直翁蚤作帖  
真蹟一卷三代而下帝王之學不講久矣堯疇舜啓  
指為迂譚無逸易圖金華倚席格心之效曠不復見  
根柢失養因世治亂眈其天姿培植溉一源民澤所繫  
德修罔覺基于數半其孰能顧舊興想如商宗之于  
甘盤者乎寥寥數千年發精一之蘊紹下風之間惟  
公之遇孝宗皇帝實維有之盛德光明前隆後淳大

倫用章大猷用伸大原用傳大業用昌華重文敷道  
統勅興緝熙之功蓋非一日珂韶配侍先君子行都  
尚及見賜几杖時生四十有三年寶慶乙酉歲二月  
始得遺帖于京口竊覩墨妙淳勁嚴重儼如佩玉端  
委于廟堂之上其學力功用之所充尚可即此以占  
之也留候棹三寸桓榮陳五經方斯以稱抑多慙焉  
贊曰危微精一傳之在心二典勲華光于有臨大原  
自天端倪孰尋豈無疇咨培高浚深寔明以昌舉元



難士烝哉明良嗣此德音匪鑑而諷匪宸而箴啟迪  
在初有開宸襟嚴廊南風袵衣鼓琴淵躍繭雲匣劍  
發鏘達其已充澤彼蒼黔王度之恢如玉如金進而  
虞淵賓賜發露垓北璣衡開閭陽陰九韶其諧萬奏  
皆瘠退而卷懷藝圃書林出入歐顏而加斟酌湛湛  
秋江岌岌春峯如彼德人危冠整簪不伐不矜森嚴  
深沈我考問學惟心靡湛端本自我何用弗欽重抵  
九鼎傾踰萬琛維帖可觀為世之砭鍼尚信我言匪今

斯今

洪文惠盡箚帖

楷書  
五行

迺再拜非才猥叨誤擢遂有盡箚之便忻愜可知所幸  
餘潤可借得苟免大譴百懷俟面茲不繁及迺再拜

右隆興丞相魏國洪文惠公迺字景伯盡箚帖真蹟  
一卷公相孝宗僅累月而歸自菴陰徘徊綠塋者十  
有餘載澤雖不下究而難進之操凜然有可觀者珂  
雖屢識公隸古而真蹟之見則昉于茲蓋寶慶乙酉

之正月得之中都馮氏

贊曰公作隸古與先漢侔發為書翰順塗挾輶公相  
孝宗曾不少留歸安一丘終始休休我葭淮餉祖公  
前修登華信亭步得江樓摩挲石題瞻睇銀鈎風靜  
鵲巢月明沙鷗意公其來偕造物游蹟則不磨心兮  
焉求

蔣丞相得男帖

草書  
八行

帝再拜上問尊嫂安人恭惟懿候萬福姐姐致意新婦

都拜起居諸令嗣承務以次各計侍奉休吉節屯孤多  
難舉無與比娶後十八年方得一男甚慰牢落半年之  
間百病迭至竟以不起哀惱無聊上狀崖畧併幸照恕  
也節再拜上問

右乾道宰相資政大學士蔣公節字子禮得男帖真  
蹟一卷公家于常予以嘉泰壬戌十一月適由錫山  
得之士人蔣深蓋公族云

贊曰仕遭時相真主材之充澤斯普以端逸御妍嫵

諒予言法當取

虞忠肅萬里帖

行書十  
四行

允文自建鄴分携相去萬里不奉一行書君子之思勤  
甚扶病遠來次鄂渚竊知易節江西清議以久外為淹  
允文不敢以賀也如病身骨立豈當復出沉懇辭之章  
六七上必有報可者即西湖為投老計矣不果一一親  
作報書亦久病有未能勉者千萬深諒之也行止稍定  
別上狀右謹具呈正月允文劄子

右乾道相國維師雍國虞忠肅公允文字彬甫萬里  
帖真蹟一卷公以任重之器邁往之識濟時之才基  
殊勲位元宰表表為世名臣當其自西掖出掃邊氛  
遂戡大憝江上之人至今能誦其遺烈是時沈憲敏  
以樞曹隨軍此帖蓋與公西湖後往還書尺金石交  
情藹然尚可覩也紹定戊子二月予在京口得之憲  
敏之孫鏗聲甫

贊曰方長鯨之于珠駭百川之騰浪撼坤軸其欲裂

有非公之思壯策數船之奇勲射天狼于北向旣旄  
頭之夜殞宮紛披而投仗歎微管其左衽曾垂寢于  
素王凜百年而若存耿英氣于江上攬遺帖以在手  
並風雲而獻壯飲胸中之崛奇為筆下之豪放念舊  
交于漕輓寓執訊之還往慨寶傳之至今猶足慰夫  
馳想予嘗攷史牒之終始論餘功于翼亮觀其位上  
宰以乘成猶未忘大義之獨唱謂取秦而下燕可拊  
背而扼吭軒輝靡慕于金鉉節斧乃攷于玉帳常王

業溺于積安之久而人心頗有振起之望迨時數之  
未偶隆妖星于五大故議者不見于異時之所就而  
得以冥疑于當日之自將何禍毒之難瘳本亡秦之  
蠱喪嗟羣情習見于苟且宜隻手莫支于締創予所  
以抱遺槩于五紀悼成心于一相既什襲以致其真  
慕又三歎而繼之惆悵也

曾丞相臨平帖

行書十  
一行

懷悚息匆匆片札叙違方愧率略舟至臨平速勤海翰



所以慰藉甚寵顧懷危蹤得以善去心匪木石寧不知  
歸更冀涵覆以終大惠引睇光儀第劇依戀之至右謹  
具呈觀察節度太尉宗文六月日觀文殿大學士宣奉  
大夫提舉江州太平興國官曾懷劄子

右乾道宰相觀文殿大學士曾公懷字欽道臨平帖  
真蹟一卷宣請故家再秉相軸實自公而復此帖乃  
公去位時予當時近臣之同姓者嘉泰辛酉歲八月  
得之鄂渚曾氏孫監征家忘其名

贊曰書尺之作趨簡便情之所託斯可見志雖少貶  
言猶婉體雖少詘敬猶簡堂堂相國縉衣彥明哲自  
將亦通願疎然述贊覽遺卷我欲以之參世變

寶真齋法書贊卷二十五

欽定四庫全書

寶真齋法書贊卷二十六

宋 岳珂 撰

宋名人真蹟

李子至稟議帖

案此帖行  
數原本缺

若川近赴都督府稟議往來經月疎拜記府之問方深  
悚懼特被誨墨仰認謙眷之厚下情不勝感刻敵中多  
事報契丹復盛金人族中有立者且旱蝗大作前日報

敵帥被殺繼聞乃副元帥中箭又云已死然皆未有端的宿州之舉敵皆騎兵我合用步卒以勁弩尅敵弓制之乃專用馬軍彼衆我寡彼強我弱十四日之戰敵援未集我雖勝而馬軍傷中者已大半此一失也破城之後當傾府庫以犒將士振旅而歸以成全功乃占吝所獲恬不知退坐待其援兵之至此二失也敵援雖至若早入城堅壁不戰以逸待勞至如劉錡在順昌時亦可成功不知出此以致二十日二十一日之挫此三失也

二十三日入城不待敵兵之解門小兵衆自成蹂踐壕外之兵為敵所乘此四失也既議班師合先約束不得遺棄器甲以備追襲更無隊伍紛亂而歸此五失也有此五失宜其成功而敗今大軍所損不及二分喪馬雖多亦不多半棄甲尚可添造猶為莫大之幸也使敵有謀詐為敗衄引我直至南京以兵斷其後路或不予宿州城下交鋒但立兩硬寨于濠泗歸路為之奈何今日思之猶不免寒心此皆不審彼已失于輕敵所致也今

日之事尤宜以守禦為先守禦之策無如以重兵屯江  
上以固根本輕兵屯淮南以為藩籬淮東以水為形勢  
淮西以山為形勢可以壅水即壅以浸其地餘皆清野  
以軍官同民兵各據形勢堅壁為守敵寇之來勿輕與  
戰但斷其糧道劫其營寨使不得久住或敵寇大入力  
不可禦遏即渡江共為固守今防秋在近宜速定其議  
內外協力措置捨此恐別無此良策也措置已定根本  
已固如敵人衰弱以機會可乘亦不害于恢復如敵中

多故復欲尋盟亦不害於講和若用區區愚見素守此  
論因以用兵昨日得盱眙探報謹稟封呈伏冀台照右  
謹具呈六月日右朝請大夫戶部尚書郎中總領淮西  
江東軍馬錢糧李若水劄子

右乾道戶部侍郎李公若水字子粟議論帖真蹟一  
卷帖蓋出于隆興符離退師之時予在京口與公從  
子權為寮因求得之實寶慶元年之八月

贊曰金本世讎固當厲不共戴天之義遼本與國亦

可同仇而互倚中原尺寸之壤皆天之所以全界又不應不效前人之堅守而輕于棄是三說者固無可議然以予攷之其時則隆淳之間事體大與紹興異如帖中語固謂之失策而亦出于勢之必至也昔漢之席卷本肇于從東歸之士燕之復振蓋猶有垂寶令麟之徒以為子弟本朝順昌之力守亦歲月之未深而人心戴漢有死無二既歷三十年矣則居者已安而無歸意誰復有敢為之氣亡者燼滅而不復



熾彷徨故臣凋落宗裔亦何以為之地懷慕者既已  
閱世而遺黎之習已成其族類城壁雖不改于昔而  
所與共守者皆岌然而不可恃又安得以前日為比  
先生出師之議曰大遼有可立之形金人有破滅之  
理蓋以及時經理為社稷無窮之計其在朱仙鎮去  
京師四十五里拳拳忠憤一日百啟亦必曰此正陛  
下中興之時金人滅亡之會又以欲弭後患惟在于  
乘勢於虜投機者間不容穰政使能者亦不能違時

以致利而顯忠輩又何可求其備春秋之法責在于  
帥予意魏公之心亦懼其愈久愈忘而為是萬一之  
覬予故于此帖重惜先王之機而竊哀魏公之志也

張安國書簡帖

十帖並行書第一帖十一行第二  
第四第六第七帖各八行內第四  
第六帖各尾批二行第三第八第十帖  
各十二行第五帖九行第九帖十三行

孝祥伏以秋令告中伏惟都運顯謨右司持要尊兄玉  
節在途台候動止萬福孝祥罪戾之迹又蒙罷免得還  
共子職實大庇之自政遠瞻承伏乞為時珍護亟膺禁

密之除右謹具呈八月日左朝奉郎充集英殿修撰賜  
紫金魚袋張孝祥劄子

孝祥惶恐拜問台眷上下均有休祥令嗣皆在侍傍否  
老親久託大芘知感得四月間書久不聞安耗矣江東  
委令惟一垂示孝祥惶恐拜問

孝祥比奉還教極荷至意不勝感激春物已半伏惟台  
候萬福孝祥極欲一至府下孤危多畏欲發復止懇辭  
不獲今不免盡室沂江以行連年道塗吁可厭也買紙

極荷篤念糧法如此足矣告為併手甚幸非理作煩惶  
恐死罪臨行別遣狀右謹具呈若虛總管御帶承宣台  
座二月二十三日左朝奉郎充集英殿修撰張孝祥劄  
子

孝祥再拜上問台眷上下均有休祥老親蒙問多感常  
收安問也過郡齋切為致千萬意亦作書告別矣妙鮓  
已領殊荷分甘湖湘間有委示及孝祥再拜上問  
恐有篋刀子佳者告求一副無即已之惶恐惶恐

孝祥在池口具書託利君行後附郡中人必已達即日  
不審尊候何如孝祥至九江累日以俟劉樞到小留奉  
近況極感告再四致問葉文極恨不一見也扁榜非所  
惜當託六哥帶行藥方先遣去餘俟後信四月二十二  
日孝祥頓首德初宣教大哥座下

孝祥惶恐再拜台眷上下均介休祉劉樞昨日得報約  
至九江相見當是舟行耳德初幸得一見即還侍傍極  
憇憇也不知可暫令至九江否孝祥至決須作五七日

留耳孝祥惶恐再拜 舟中不辨視所賜為報忽過

孝祥伏蒙垂諭魏監謹悉台意渠但欲出門下淹速不敢計也未行尚圖再詣右謹具呈府判朝議台席十二月日左通直郎提舉江州太平興國宮張孝祥劄子

孝祥列郡地卑公府禮絕雖緣雅舊難躡等威不謂至仁尚記孤官下教收恤敷蔭庇庥飭誨載勤噢咻無量展刷摧羽不復驚弦封殖陳荻更俟吹律冀保危蹤不任叩叩之至右謹且呈承議郎充敷文閣待制知靜江

軍府事張孝祥劄子

孝祥惶恐慶禮已右具啟比獻歲以來履道何似惟天佑元弼壽日升而德山立也孝祥遠守節符以大莛所洎幸脫罪尤然塵垢冠巾未得一侍几杖為恨心馳門下何日可忘右謹具呈承議郎充敷文閣待制知靜江軍府事張孝祥劄子

孝祥頓首比聞體候就平不勝欣慰況秋氣乘肅必于眠飯易為調適欲日夕間一詣齋坐祇款未審可否公

酌六器備飲劑之用幸留納右謹具呈承議郎充敷文閣待制知靜江軍府事張孝祥劄子

右乾道敷文閣待制于湖居士張公孝祥字安國書簡帖十幅真蹟一卷紹熙乙卯同舍沈聲甫以曬書節出諸法書德化邑治中漪嵐堂下以前兩幅授予蓋其祖詹事樞持要所藏書尺後八帖雜得之諸好事家不復編繫歲月思陵嘗因進對見公奏疏玉音諭公曰稍進乎此便可名世觀公合作處骨力固已



軒軒如鯤擊鵬運蓋一日九萬未可量也公則仙矣  
故其可睹者止于是

贊曰漢輕法言耳目所忽予藏于湖亦近世物氣並  
華劍烈同段笏匪尚其容亦尚其骨

張國安寫坡詩帖

楷書  
五行

西湖處士骨應槁只有此詩君壓倒東坡先生心已灰  
為愛君詩被花惱多情立馬待黃昏殘雪消遲月出  
早江頭千樹春欲暗竹外一枝斜更好孤山山下醉眠處

點綴裙腰紛不掃萬里春隨遠客來十年花送佳人老  
去年花開我已病今年對花還草草不知風雨卷春  
歸收拾餘香還畀昊

右張安國書東坡和秦太虛梅詩帖真蹟一卷紹定  
戊子二月得之京江于湖少小楷今帖視他書特為  
道婉可觀

贊曰玉妃粲粲怯詩瘦秦艷蘇腴畧先後于湖筆力  
並奇秀手執遺篇欲三嗅

張安國東坡三養

行書  
九行

東坡居士自今日已往飲食不過一飲一啄有尊客盛饌則三之可損不可增有召我者豫以此告至人不從而過是乃止一曰安分以養福二曰寬胃以養氣三曰省費以養財元符三年正月七日于湖居士

右張安國東坡三養帖真蹟一卷安國字法多奇而此帖尤勁挺以之書知德之言垂世之訓稱矣帖亦沈聲甫所遺蓋後秋中二帖十四年云

贊曰在易之頤飲食以節推而廣之有是三說蒸壺  
發冪衰髮滿憤機赤乳白未死神泣萬金之璧護一  
蟻缺彼過分者于我何得昔傳者詩今見者帖昔以  
事戒今以理悅吁嗟先生何學非易稱此翰墨是謂  
知德

陳正獻權攝帖

楷書十  
二行

俊卿悚息啟別忽歲晚良以悵企辱惠書審寒甚履用  
佳福承有分教宗師之命懼慶缺尚幾時與見任人為

代耶俊卿碌碌且滿歲來春力丐投閒少休疲恭耳下  
諭教官闕已差詹令權旬日矣續有攝闕當即奉報也  
未有見日尚千萬加厚復狀不宣俊卿悚息啟宗教從  
政

右淳熙宰相魏國陳正獻公俊卿字應求權攝帖真  
蹟一卷孝皇勵精庶政公以元儒受異知秉國成不  
激不隨以昌其蘊當世稱厚德者歸焉袞衣東山從  
容始終全節歸然尚可仰也帖以慶元丙辰七月得

于公之孫坦實予姁家

贊曰英宰翼天絳治象開淳熙雖云簡牘間已具梁  
棟資瀛海渺且清壺山秀而滋膚寸起膏澤筆意儻  
可知

梁文靖南安漳巖泉福三帖

並行書第一帖十七  
行第二帖九行第三

帖十  
行

克家頓首再拜持志運使朝議老兄台座自聞使節及  
境既再上狀想繼以達秋暑特甚弭節之初伏惟台候

萬福眷集小大均休克家哀病閒處為宜但深負空食  
之慚爾泉之南安令江君廉平有威信邑人甚安之祖  
母年踰九十而使司使與福清對移公私之計皆非便  
今渠有申狀乞留舊任望主張依所乞也屬如晦婦  
病背瘡舉家甚惶駭而克家亦苦臙臙上狀草草不罪  
何當行部俾獲瞻款餘冀倍自珍護以承寵用不勝至  
願不宣克家頓首再拜持志運使朝議老兄台座

七月二十六日克家頓首再拜持志運使朝議老兄節

下北上狀度通覽久矣至節俯臨伏惟倍擁休祉方  
嘉猷迪功今自踏逐得漳巖主簿丁憂闕度人皆未切  
望便以差牒付去介也立作此書幸恕草率十一月三  
日謹狀克家頓首再拜持志運使朝議老兄節下

迪功郎新授郴州郴縣尉方嘉猷

尊嫂郎娘一一安勝家人輩致問訊舍弟愁悶中未及  
上狀望加察前辱示書情文過當不更具外啟敢少懇  
表兄趙中父家得旨所在應副葬事在法合得千緡有



使臣狀子封納望便為施行令泉福兩州分認應副蒙  
賜厚矣老兄與渠兄弟契素不薄度不待多禱也克家  
再拜

右淳熙宰相鄭國梁文靖公克家字叔子南安漳巖  
泉福三帖真蹟一卷祖宗盛時士習醇厚書牘間不  
為溢美謬敬而真意藹然可挹此帖雖出近世尚可  
髣髴也寶慶乙酉三月婺將張松自中都以國初四  
功臣像介帖見遺

贊曰詞真意決不屈不狎端重有法此近世名臣之帖承平流風尚或可接予欲以此觀相業

范參政行臺兩司常州成都四帖

並草書第一帖  
八行第二帖十

二行第三帖十九

行第四帖十七行

成大少稟林得之見過求一言云有公狀詣行臺鄉親之故敢忘僭率且其言亦有緒論幸冀垂情他容探伺留中之除詞馳賀幅次右謹具呈五月日左朝奉郎集英殿修撰新知靜江府范成大劄子

成大比蒙誨筆欽認眷意昨已盡卻鼓笛等調可降臨  
竟辱鄭重如聞來日兩司之招軒蓋欲二十二日午間  
具家飯款契闊敢幸不外他遲面盡右謹具呈二月日  
中大夫提舉洞霄宮范成大劄子

成大拜覆五一兄即日伏惟尊候多福比承累書知安  
慰甚且收三哥書知己赴常州且得食祿以歸養非細  
事須謝祖先積善所致也七哥九哥在此甚安但為先  
生丁憂廢學已議別請先生也但未有赴試藝解者極

以為憂耳兄且得一子食祿自此可以水溢長流矣弟年來多病早衰鬚髮如雪骨瘦如柴食少藥多如此度日可以想見況味未閒一味瞻想而已今略此通問三哥不及別書且善將息凡事勤謹三嫂姪孫安勝大姐且安跡不說親否未閒將愛為祝不備九月十一日成大拜覆五一兄座前更送去新附子十枚

成大拜覆五一兄座前暑候伏惟尊候萬福成大自正月起離廣西六月七日方入成都府路界交割今已入

城了在路恰四箇月以上川陸相半受萬千辛苦艱險  
他時歸來面說書中說不盡也新婦自遭壓後到荆南  
上下方得性命可保又為路中辛苦到漢川大病至今  
未能坐起擾撓可知成大止存四莖骨頭烏皮包裹其  
不仆于道塗者天也七哥九哥遠路一遭卻得安樂九  
哥氣弱多病全不及七哥也前日在桂林時先生不得  
人枉壞了光陰今已得一佳士矣旦夕事定敷逼兩人  
為學矣三哥曾討得權局否新生想甚長進大姐想且

安跡于高氏也定女日長已議所向矣因遣成人過行  
在今過平江通安問未閒伏乞保重不備六月九日成  
大拜覆五一兄座前

右淳熙參政資政大學士石湖先生范文穆公成大  
字至能行臺兩司常州成都四帖真蹟一卷近世能  
書惟范張相望筆勁體道可廣可狹如公抑足以名  
家矣嘉定癸未十月得前一帖于維揚醫者劉大聲  
次二帖後一歲十月得于平江鬻者何義又兩歲三

月復得後一帖于金壇士人劉克家

贊曰縱之而矩不踰歛之而鋒無餘實蘊而華敷雲  
爛而霞舒雖曰近世之書亦足以為軒凡之娛久而  
信信而傳其殆留而為後世之須臾戲石湖

范參政書懷詩帖

行書十  
二行

書懷二絕重送文高季兼呈府公貳卿

劍門雲棧守非難函谷泥封久未刊今日漢中誰國士

莫教春草上齋壇

西出陽關有舊知薰風淥水泛蓮時煩君傳語詩書帥  
更寄臺城別後詞

右石湖書懷詩帖真蹟一卷此詩似寄示興元連率  
者在淳熙間殆是章德茂諸君而未得其人也帖以  
嘉定己卯十月得之建鄴

贊曰當平世而慨想齋壇之國士因送客而遂及陽  
關之舊知蓋拊髀之思在上弗替故淳熙之士夫亦  
不敢一日而忘可將之奇斯帖之傳固未易例以近



世之詩也

王文定省中要津二帖

並行書第一帖十  
四行第二帖十行

淮昨承枉顧屬留省中歸捧盛刺悵仰何已奉教喜審  
即日尊候萬福夔憲歸守二書蒙不外謹納上已及周  
旋之意矣方總領少與之接者承命不獲惟推照何日  
戒行尚須面別右謹具呈十月日淮惶恐上呈

淮頓首再拜淮違奉談塵閱時淹久山斗之仰不勝勤  
拳頃歲一拜書函繼嘗具狀自是汨沒莫遑嗣音者謂

如俊望宜踐要津日冀除召見有承教之樂何意尚貳  
近藩惘惘逮今愧生顏表辱台慈鑒諒萬萬之幸淮惶  
恐頓首再拜

右淳熙宰相魯國王文定公淮字季海省中要津二  
帖真蹟一卷公輔阜陵歲月最久總領衆職要必有  
以稱上意而非偶然者發人劉多祐多蓄近世翰墨嘉  
定戊寅六月予得之嘉禾

贊曰謹嚴而穩愜一筆之涉足寓心法淳熙之相業

動守檢押耳目猶接列于書笈百體不乏是曰王魯公之帖

周文忠寶眷帖

行書  
六行

必大僭易拜問年家寶眷敬想上下均祉或有委顧聞台命必大僭易再拜上

右兩朝相國太師益國文忠公必大字洪道寶眷帖真蹟一卷舜禹授受公以元臣陟降帝廷鎮安八紘磐石九鼎益近世以文致身以道致主以學致用全

名終始進退雍容未有公若者幅紙之得維以尚德  
嘉定乙亥時維元夕觀于京圃售此真蹟

贊曰廬陵之文忠前歐而後周筆法之可稽歐勁而  
周柔苟內心之是似豈外蹟之能求予嘗遡平原之  
津望二典之樓想公從容于墨客卿間猶足以接六  
一之風流也

張宣公書簡帖

六帖並行書第一第二帖各十六  
行第三帖十一行第四第五帖各

七行第六

帖四行

忒頓首拜啟德瞻茂才吾友座下為別寢久每用懷想  
手問遠貽慰憚可知也暑雨緬惟義履勝福祚幸爾安  
常不必念承在城中親炙正字想當日有進益來諭克  
已言持之難當用大壯之力誠然也然而力貴于壯而  
工夫密若工夫不密雖勝于暫終不能持于久而銷其  
端觀諸顏子沈潛積習之功為何如哉其有不善未嘗  
不知知之未嘗復行非工夫篤至久且熟也其能若是  
乎別紙亦答去有以復之是望其他互見諸書中矣晦

叔多時不相見却嘗通書書已寄去未知再會之日更希茂勉厚愛不宣栻再拜德瞻茂才吾友座下

栻許時幸款晤雪川之別良用悵然從者遂還金華否栻留此已幾半月館舍寬涼可以觀書但恨友朋之遠耳論語仁說亦稍稍改正矣早晚寫寄伯恭可就觀也左右天資之茂加以思慮細竊所期望惟力審自勉惟宏惟毅以進篤實之功君舉後來曾相見否近亦一得書也詣叔來吳江相見歸侍傍欲再求假來此猶未得

却數通問他非此可既今日得雨更數日可以西去矣  
拭頓首啓德瞻祕校吾友潘叔度兄弟因會致言晦叔  
已兩來相見歲晚可還來城中論及陸薛徐三君恨未  
識之此間數士略見正字書中矣敬亭記潘叔昌寫來  
方見之敬則實實則虛之意遺書中已有但虛則無事  
矣亦疑傷快了蓋無事字殺此段意思不了如明道云  
兩忘則澄然無事矣無事則靜靜則明便完全近看惟  
二先生完全精粹說話比其他先生不同其次則尹又

其次則中立次則謝上蔡後生何足以窺前輩但講論間又不可含糊爾更以其大者移于小物作日用工夫此語大意固好亦疑立言有病也栻又上

栻稽顙再拜上狀通判學士座下即晨梅雨蒸濕伏惟開決有相台候萬福栻孤露餘生不足深軫尚冀若時厚自衛重不次栻稽顙再拜上狀通判學士座下

栻稽顙再拜先公平生心純王室深痛讐恥之大誓不與俱存至于易簣惟以未克報兩宮知遇為念嗚呼痛



哉不肖孤泣血何極輓章讀之更重感慟邇求盜賊屏  
息否長才淹汨為重歎也栻稽顙再拜

栻叩首再拜齋醢及寶峰新笋見寄得以備薦奉愧感  
愧感建茶甘片輒馳浼幸檢留栻叩首再拜

右淳熙侍講南軒先生張宣公栻字敬夫書簡帖六  
幅真蹟一卷公以道鳴孝宗朝學者從之如雲前三  
帖乃與婺士喬拱德瞻者予嘗從公之猶子匠監忠  
恕丐遺墨以藏寶慶乙酉三月匠監書介德瞻之孫

宗亮來遂得之言皆諄諄所謂造次不離乎道者後  
三帖結定戊子二月得之京師

贊曰紫巖之傳原委一忠遡而伊濂根本一中事君  
致身其用則同自我淑人派于五峯力久積真至公  
而充淳熙之間天下為公守道彬彬洙泗之風公于  
是時不下禹功據德游藝言立志通故其遺書筆意  
俱工我得而藏敢忘所宗淵淵其心皜皜其容學冠  
穹壤名儕岱嵩萬世仰之曰人中龍

欽定四庫全書

寶真齋法書贊卷二十六